



## Šerijatske intencije zarad kojih su ibadeti propisani (Medina)

Hatib: dr. Husejn ibn Abdulaziz Alu Šejh

25. ramazan 1442. po Hidžri / 7. maj 2021.

Sva hvala pripada Allahu, Gospodaru Koji daruje iz plemenitosti Svoje da dobra djela budu privedena kraju. Svjedočim da nema boga osim Allaha, Jedinoga, Kome niko nije ravan, On je Gospodar svih svjetova. Svjedočim da je Muhammed Allahov poslanik i vjerovjesnik, što prednjači u dobru nad svim stvorenjima. Neka je Allahov mir i blagoslov sve do Sudnjega dana na našeg Poslanika, na njegovu porodicu i na vrle ashabe.

Cijenjeni vjernici! Budimo bogobožni, pokoravajmo se Allahu, jer je to jedini način da se sreća i uspjeh ostvare na ovom i budućem svijetu.

Svi ibadeti u islamu naređeni su zarad viših ciljeva, iz sveopće Božije mudrosti, noseći u sebi prefinjene tajne. Svaki ibadet propisan je kako bi ljudi ostvarili određenu korist na dunjaluku ili ahiretu. Ibn Tejmijja kaže: “Pravi islamski pravnik je onaj ko razumije intencije islamskog vjerzakona.” Post ovog mjeseca, kao i svi ibadeti u njemu, su – kao što Ibn Kajjim navodi, “propisani kako bi se ostvarile koristi koje mogu shvatiti samo oni što su razumom obdareni i čistom prirodom osnaženi”. Upravo radi ovoga, propisani su svi dnevni, periodični ili godišnji ibadeti – kako bi se vjera osnažila i podigle ambicije, kako bi se duša očistila, a savjest čovjekova probudila, kako bi u srca bila spuštena klica čednosti, čestitosti i morala.

Najviša intencija radi koje je propisan post ovog mjeseca i noćni namaz u njemu jeste kako bismo bili bogobožni, kako bismo Uzvišenom Allahu pokorni postali. Ovo je cilj koji se želi postići svim ibadetima i naređenim djelima, kao što Ibn Kajjim pojašnjava: “Post ponajviše doprinosi tome da se bogobožnost osjeti. Post je kruna bogobožnih i upečatljivo djelo odabranih na ahiretu.”





Zato, poštovani vjernici, marljivo činimo ibadete u ovom mjesecu kako bismo očistili srce i tijelo, kako bismo dobru završnicu zavrijedili na ovom i budućem svijetu: “A onome koji je pred dostojanstvom Gospodara svoga strepio i dušu od prohtjeva uzdržao Džennet će boravište biti sigurno.” (En-Naziat, 40–41)

Neka ovaj mjesec bude tačka s koje ćemo pronaći ljubav prema Uzvišenom Stvoritelju, kada ćemo potpuno ponizno prihvatiti Njegove naredbe, početi ih doslovno izvršavati, kada ćemo se kloniti svega što je zabranio i što izaziva Njegovu srdžbu. Šatibi pojašnjava: “Osnovna intencija zbog koje je islamski vjerovodstvo uspostavljen jeste namjera da vjerski obveznik prestane slijediti svoje strasti i da se umjesto toga svojevoljno počne pokoravati Allahu, kao što Mu se moli u slučaju nedaće.” Radi toga, budimo krajnje oprezni i ne dozvolimo sebi da se poistovjetimo s onima koji prestanu praktikovati islamske propise nakon ramazana, prestanu obraćati pažnju na stroge naredbe i počnu činiti razne grijeha i ružna djela. Ponajviše zbog toga što nam Uzvišeni Allah naređuje: “I sve dok si živ, Gospodaru svome se klanjaj!” (El-Hidžr, 99). Imam Ahmed b. Hanbel i Fudajl b. Ijad često su govorili: “Teško li se onome ko za Boga zna samo kada ramazan nastupi.”

Jedan od šerijatskih viših ciljeva zbog kojih je propisan post mjeseca ramazana također je važnost postojanja snažne muslimanske zajednice, čiji članovi zajedno žive osjećajući međusobnu ljubav i saosjećanje, želju za međusobnom pomoći i bliskosti. Mjesec ramazan je poput vodiča koji muslimanu kazuje šta srce čini čistim, pojašnjava kako da u sebi ne nosi mržnju i netrpeljivost, zavist i prezir. Poslanik, sallallahu alejhi ve sellem, rekao je: “Kada neko posti, neka ne govori ružne riječi i ne čini ružna djela. Ako ga neko uvrijedi ili napadne, neka uzvрати riječima: ‘Ja postim.’” (Muttefekun alejhi)

Ibn Abbas, radijallahu anhu, upitan je: “Kako ste se vi pripremali za dolazak ramazana?”, pa je odgovorio: “Niko od nas ne bi imao smjelosti dočekati ramazan, a da je koliko truna u srcu svome bio zavidan svome bratu muslimanu.” Mjesec





ramazan je mjesec bratske ljubavi i pomirenja, darivanja i udjeljivanja, plemenitosti i požrtvornosti. Jer, ko priredi iftar postaču, imat će nagradu kao i postač.

Zato ove lijepe osobine učinimo svojim životnim motom, imajmo ih pred očima uvijek i djelujmo u zajednici shodno tome.

Poštovani vjernici! Nakon što provedemo dane ramazana, osjetimo povjetarac dobra u njemu i ukrasimo se lijepim ponašanjem prema drugima, važno je da ostanemo oprezni od toga da ponovo počnemo činiti ono što ne donosi dobro ni na ovom ni na budućem svijetu. Dobro razmislimo o značenjima i poruci ovog hadisa u kojem Poslanik, sallallahu alejhi ve sellem, upozorava: "Moj narod će patiti od bolesti koje su zadesile ranije narode." Prisutni upitaše: "Allahov Poslaniče, od čega su raniji narodi patili?", a on odgovori: "Od nezahvalnosti i obijesti, nadmetanja i netrpeljivosti, potom mržnje i zavisti. Takva djela bivaju razlogom da se svaka granica pređe, nakon čega počinje međusobno ubijanje." (Hakim).

Neka naš ummet, ujedinjenom snagom, uzme sebi za cilj da ostvari više ciljeve zbog kojih je propisan post ramazana, noćni namaz i učenje Kur'ana u njemu, čime se u našoj svakodnevnicu mogu učiniti stvarnim svi uzvišeni ciljevi islama i njegov suptilni smisao, kako bismo zajedno hodili Pravim putem u svakom segmentu života.

Sveti mjesec ramazan trebao bi biti polazište za svjesnije djelovanje radi vlastitog produhovljenja, kada je potrebno očistiti se od svih ružnih osobina koje su se kroz svakodnevni život infiltrirale u nas; a sve to u cilju da ostvarimo najviše deredže i ostvarimo najviše ciljeve, na koje nas je vjera podstakla. Poslanik, sallallahu alejhi ve sellem, kaže: "Ko ne prestane govoriti ružne riječi i činiti ružna djela – neka zna da Uzvišenom nije potrebno da prestane jesti i piti." (Buhari)

Potrebno je da u ramazanu podučimo sebe da ne pristajemo na to da nas zaokupiraju trivijalnosti i bezvrijedni sadržaji, da ne smijemo pristati na to da nas, sklonošću naše duše ka zlu, zlo nadvlada, pa da sebi udovoljimo čineći ono što je suprotno Božijim zakonima. Upravo radi ovoga Poslanik, sallallahu alejhi ve sellem, kaže: "Post je štit."





Ko želi ostvariti dobro na ovome i onome svijetu, nužno će se ponašati sukladno s intencijama posta, ustrajno ih primjenjujući u svakom segmentu svoga života.

Poštovani vjernici! Korist od ibadeta pripada ljudima, koji su u prijekojoj potrebi za Uzvišenim Allahom, a Gospodar nije ni o kome ovisan i jedini je hvale dostojan. Radi toga je potrebno da damo sve od sebe kako bismo iskoristili svaki trenutak svoga života čineći djela koja će nas približiti Allahu. Na ovome je itekako važno insistirati u ovom vremenu, dobu velikih iskušenja koja su nas zadesila. Navodi se u kudsi-hadisima da je Uzvišeni rekao: "O robovi Moji, Ja samo vaša djela bilježim, i prema tome vas nagrađujem ili kažnjavam. Koga dobro snađe, neka se Allahu zahvali, a kome bude nešto drugo priređeno, neka isključivo sebe krivi." (Muslim) Također se u vjerodostojnom hadisu navodi da je Poslanik, sallallahu alejhi ve sellem, tri puta kazao: "Amin", nakon što se uspeo na minber. Naknadno je upitan zašto je to učinio, pa je pojasnio: "Došao mi je Džibril, alejhis-selam, i rekao: 'Neka je daleko od Allahove milosti onaj ko dočeka ramazan i ne bude mu oprosteno, pa zbog toga skonča u Vatri! Reci: Amin.' Na to sam rekao: 'Amin.'"

Poštovani vjernici! Činimo dobro u životu, budimo bogobojažni, kako bismo dobro na dunjaluku i ahiretu zavrijedili.

Jedno od dobrih djela jeste često donositi salavat i selam na našeg plemenitog Poslanika. Neka su Allahov salavat i selam na njega, na njegovu porodicu, ashabe i sve one koje ih slijede u dobru do Sudnjeg dana.

Uzvišeni Allahu, primi naša dobra djela, uslišaj nam dove, grijeha nam oprosti. Gospodaru naš, smiluj se svim vjernicima i vjericama, živim i mrtvima, svima bez izuzetka grijeha oprosti.

Uzvišeni Allahu, smiluj se umrlim muslimanima. Oprosti im, smiluj im se i sve grijeha zanemari. Uistinu si Ti Živi i Vječni. Gospodaru naš, ponizno Te molimo da podariš da se svaki vjernik oslobodi briga, da se tuga od njega odagna, da mu se dug isplati. Gospodaru naš, podari lijek svim bolesnicima. Uzvišeni, ukloni nedaću koja nas je





"KOLIKO GOD ZNAČAJNA ULOGA HATIBA BILA ZA USPJEH NJEGOVE HUTBE,  
NIŠTA MANJE NE ZAOSTAJE NI ODABIR TEME, ODNOSNO MATERIJE  
KOJU TOKOM HUTBE ELABORIRA." (PREPOROD)

**HUTBE** 

snašla. Gospodaru, nas je nevolja snašla, a Ti si od milostivih najmilostiviji! Uzvišeni, podari da nestane ova bolest što je cijeli svijet snašla, ona nam život i ispovijedanje vjere otežava! Uzvišeni, samo Ti možeš darovati da ova bolest nestane, niko osim Tebe to nije u stanju. Podari da nestane jer si uistinu darežljiv i svemoćan.

Uzvišeni Allahu, prihvati naša djela, jer Ti sve čuješ i sve znaš. Gospodaru, podari da dovršimo post ovog mjeseca i da namaz u njemu obavljamo, jer si Ti Živi i Vječni. Uzvišeni, daruj nam da provedemo Noć kadra u ibadetu, jer si Ti uistinu darežljiv i plemenit, milostiv i dobronam. Uzvišeni, daruj nam da provedemo Noć kadra u ibadetu, kako bismo veliku nagradu zavrijedili. Uistinu si Ti milostiv i samilostan!

Zatim, znajte da vam je Allah naredio da donosite salavate i selame na Njegovog Vjerovjesnika, pa je rekao u mudroj Objavi: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šalžite mu pozdrav!" (El-Ahzab, 56)

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

